

Lou parc d'Ordessa ! Lou qui nou l'a bist nou pod pas abé-n ue idée e lou me calam ,qu'ey trop praube enta dise-n toute la pouésie. En bertat que sèmbre u casau beroy ourdounat e arrécaptat per u yardinè mistérious.

Lou sendè muletè oun caminam, ença, enla, de chicoys arboulets touts rouns que garnéchen dab armounie l'espaci estret oun la yèrbe frésque e rase s'afayte de bibes flourétes de mountagne. Mey enla lous grans pis soumbres e drets coume la yustici que ténen las branques dingu'au sòu enta mielhe apriga lous ausèts qui ey canten lou gay de bibe. Aquestes tabé coum si aben u mèste musicayre enta gabida-us que lancen yuste au moumen qui cau las notes bouludes. Lou mèrlou, lou cardí, lou rey-petit e lou pinsâ que s'en soun abien-guts dab lou bentoulet leuyè qui cante hens lous pis e l'Arrazas qui tambourinéye sur las roques enta basti ue obre musicayre d'éley... L'ayre fresc dou mayti, l'ahidance d'arregoula-s, tout û die, de bertadèrè béutat, lou gran gay d'esta loegn dous trebucs dou mounde, tout aco que hasè que nou troubabem la terre debât lous pès. Lous sents anyous que-s prestaben las ales !... Si yamey eb arribe de plega debat lou hech de quauque machant hat, anat en Ordessa cerca la pats dou cô. Aquiu, l'òmi desestruc n'a pas encoère boutat la ma.

Cause estranye, aquet parsâ tant apatsiu qu'ey clabat per muralhes drètes e séques qui semblen castèts gigants e desruits. A ma esquèrre las muralhes que soun mey lises, mey drètes encoère e rouyes coume si ù pincèu mistérious e las abè triscades. Aquiu en ue bréque que-s troben las « clavijas de cotaduèro ».